

ლილე შენგელია

„მივლინებიდან-მივლინებამდე“

რადიოპიესა

მოქმედი პირნი:

ჰამი-ახალგაზრდა ქალი

ტეტი-საშუალო ასაკის მამაკაცი

სანდრა

სურათი პირველი

ჰამი- ასე ხომ საწოლს არავინ ალაგებს, არა, რა არის იმაში უცნაური, რომ ბალიშებს საპირისპირო მხარეს ვაწყობ (პაუზა). უბრალოდ ასე მომწონს (პაუზა). უბრალოდ? თუმცა რა მნიშვნელობა აქვს, რას იფიქრებს სხვა. ვინ სხვა? (პაუზა) შეიძლება სანდრა. სანდრა კარგი გოგოა...

ტეტი-ჰამი, ჰამი (ემახის), მოდი ჩემთან, ჩაგეხუტო. მშვიდობიან და ლალ დღეს გისურვებ.

ჰამი- შენც, ტეტი. მიუხედავად იმისა, რომ ქალაქში ვართ, მაინც როგორ იგრძნობა მიწის სუნის, გაზაფხულის სუნი.

ტეტი-ჰამი, შენ ჯერ კიდევ სუსტად ხარ.

ჰამი-არა, დღეს ორშაბათია სახლში ვერ დავრჩები, თანაც როგორი სიცოცხლეა ირგვლივ...

ტეტი-მაშინებ, ჰამი...

ჰამი-ნუ შინდები, ტეტი.

ტეტი-რა უცნაური ხარ, ჩემო მშვენიერო.

ჰამი-შენ უფრო უცნაური ხარ, იმიტომ რომ უცნაურის უცნაურად გესმის... მომეფერე, ტეტი...

ტეტი-მოდი, ჰამი (იღიმის).

ჰამი-რა მალე გავიდა შენი მივლინება (პაუზა). ჩემოდანს ჩაგილაგებ(პაუზა). მე დაგელოდები, ოღონდ ძალიან არ უნდა დააგვიანო.

ტეტი-მე ყოველთვის ვცდილობ ჰამი.

ჰამი-მეშინია ერთ დღესაც არ გავგიჟდე ამდენი სიმშვიდით, ყველაფრის თითქოსდა წესრიგში ყოფნით.

ტეტი-ხომ იცი (პაუზა) შეგიძლია მისაყვედურო, მიყვირო, ჩემო მშვენიერო.

ჰამი-მაშინ მეც გამეჩქევი, როგორც მას გამოეჩქევი ჩემთან (პაუზა). ერთი წელია ერთად ვართ, არ გიფიქრია, იქნებ დროა მოგვბეზრდეს ერთმანეთი.

ტეტი-შენი მობეზრება შეუძლებელია, ჰამი.

ჰამი- მეშინია...

ტეტი- შენ და შიში?

ჰამი-ხო, რატომ გიკვირს, ტეტი, შიში ყველა ადამიანშია, უბრალოდ ყველა არ გამოხატავს.

ტეტი-შენ სუსტად ხარ, ჰამი. არ მინდა ამ მდგომარეობაში დაგტოვო.

ჰამი-კარგად ვარ (ცოტა ნერვიულად), რატომ მიფუჭებ ამ მშვენიერ დილას, უნდა წახვიდე... გელოდებიან. გთხოვ, აღარაფერი მითხრა.

ტეტი-კარგი.

ჰამი-აი, ჩემოდანი მზად არის (კარის ხმა).

სურათი მეორე

ჰამი-ძაღლების ყეფამ გამაღვიძა. დილამშვიდობის, ტეტი (პაუზა). აქ არ ხარ, ტეტი? სად წავიდა მეორე ბალიში? ასე მალე დაგიმთავრდა მივლინება? აი, მეორე ბალიშიც.

ტეტი- აქ ვარ, მშვენიერო, დილამშვიდობის!

ჰამი-როგორ გამახარე!

ტეტი-შენ ისევ სუსტად გამოიყურები, ჰამი.

ჰამი-თვალი რომ გავახილე და ვერ დაგინახე, ვიფ...

(ტეტი აწყვეტინებს)

ტეტი-ყავას მოგიხარშავ.

ჰამი-გმადლობთ, მე თვითონ...

ტეტი-არა, მე. უშაქრო, ხომ?

ჰამი-დაგავიწყდა?

ტეტი-აჰა, როგორც ყოველთვის...

ჰამი-ეს ჩემოდანია, ტეტი?

ტეტი-ხო, ერთად ჩავალაგოთ.

ჰამი-(გულდაწყვეტილი) კარგი, ჩავალაგოთ.

ტეტი-ჩემი მშვენიერი...

ჰამი-რა თბილი ხარ, ტეტი...

ტეტი-უფრო მომენატრები, ვიდრე ოდესმე.

ჰამი-დარჩენილი სითბო შენს შვილებს წაუღე.

ტეტი-კიდევ მინდიხარ.

ჰამი-ათი საათია, ტეტი, ვერ მოვასწრებთ...

სურათი მესამე

ჰამი-მართლა რა უცნაური დილაა, ტეტი, ახლა მეორე ბალიში გაქრა, სად მიგაქვს ხოლმე. საყვარელოო, საყვარელოო (ხმას არავინ სცემს)!... აქ ხარ? სად წახვედი? რამდენჯერ გაგაფრთხილე ყავას მე თვითონ გაგიკეთებ-მეთქი. აი, საწოლის ქვეშ ყოფილა.

ტეტი-თბილი დილაა, შენ გგავს.

ჰამი-ჩამოხვედი. აი, თურმე სად ყოფილხარ.

ტეტი-ისე ჩამოვედი, არ მოგწერე.

ჰამი-მე ყოველდღიურად გწერ, ტეტი. ახლავე მოვწესრიგდები.

ტეტი-ჯერ ადრეა, თან უფრო და უფრო არ მომწონს შენი ფერი.

ჰამი-ვერ ვიტან მზრუნველობას.

ტეტი-ჯერ იწევი, მერე გავისეირნოთ.

ჰამი-საწოლს გავასწორებ, აი ასე – ერთი ამ თავში, მეორე ამ თავში...

ტეტი-ასე რატომ?

ჰამი-უკეთესად ვუყურებთ ერთმანეთს.

სურათი მეოთხე

(გაისმება სახლის ტელეფონის ხმა)

ჰამი-სანდრა, მე ხომ არ მკითხულობენ?

სანდრას ხმა-არა, როგორ ხარ, ჰამი?

ჰამი-ვწერ... (პაუზა) ჩასუნთქვა, ამოსუნთქვა...

(ისევ დარეკავს ტელეფონი)

ჰამი-სანდრა!

სანდრას ხმა-არა, ჰამი, ნომერი შეეშალათ!

ჰამი-ტეტის უნდა დავურეკო . 593 20 20. არა (პაუზა)... 555 20 არა, 577-ი, მოკლედ, როგორც არის... იმდენად კარგად ვარ, რომ აუტანელი ხდება ეს კარგად ყოფნა.

სანდრას ხმა-მე მკითხე რამე, ჰამი?

ჰამი-არა. (თავისთვის) 5 -ალო , გამარჯობა, -ტეტის ნომერი არ არის,(პაუზა)-უკაცრავად,

-ალო, ტეტი, ჰამი ვარ(პაუზა). ააა, ბოდიში... ერთხელაც (პაუზა)...

-ალო, გამარჯობა

ხმა-ნენე?

ჰამი-არა, ნენე არ ვარ.

ხმა-აბა, რომელი ხარ?

ჰამი-რა საჭიროა ერთმენეთის სახელები ვიცოდეთ.

ხმა- (ირონიულად) და არც გვარი?

ჰამი-(იცინის) გვარი მითუმეტეს.

ხმა-გეშინია გამიმხილოთ.

ჰამი-შიში? შიში საერთოდ გასაქრობია სამყაროდან , ის ყველაზე დიდი მტერია ყოფის(პაუზა). რა მდგომარეობაში ხართ ახლა?

ხმა-ვწევარ და ძალიან მომწონს შენი ხმა და შენ?

ჰამი-გაინტერესებს ჩემი მდგომარეობა?

ხმა-რატომაც არა...

ჰამი-მომისმენ?

ხმა-კი.

ჰამი -წეროები გადაფრინდნენ!!!

ჩასუნთქვა-ამოსუნთქვა... ფრიიიი... ფრიიიი....

ჰაერი.

ბაცილიები.

მომწამვლელობა.

წეროები გადაფრინდნენ!

ფრრრრრრრრრრრრ... ფრრრრრრრრრრრრ...

გულისრვა... ფრრრრრრრრ... ფრიიიიიიი.....

წეროები გადაფრიდნენ!!!

აღარ ფრიიი...

აღარ ფრრრრ...

ფიზიოლოგია... ხელის ქნევა... ფეხით სიარული... თვალთა ხედვა...

აღარ ფრიიი... აღარ ფრრრრ...

გადაფრინდნენ!

გულის რევა.

გულის კვლა.

დამუნჯება.

გარდაქმნა.

დიდი ობლობა!!!

(დუმილია)

ჰამი-აღიარე, რომ მოლოდინი გაგიცრუე.

ხმა-ვალღარებ და ვფიქრობ, რაღაცნაირად კარგი ტიპი ხარ.

ჰამი-ამას ტეტიც ამბობს.

ხმა-ტეტი ვინ არის?

ჰამი-ტეტი? ტეტი მოლოდინი. დამემშვიდობის!

ხმა-არ გათიშო.

ჰამი-გისმენ!

ხმა-შევხვდეთ...

ჰამი-ღამე არასოდეს ვსაუბრობ.

ხმა- გამორჩეული ღამე გვქონია.

ჰამი-ვწერ.

ხმა-რას წერთ?

ჰამი-ტეტის წერილებს. ვწერ

ხმა-ტეტი არ ვიცი, ჩვენ შევხვდეთ, რა...

ჰამი-უკაცრავად, საქმისადმი განკუთვნილი დრო წაგართვით.

ხმა-რა საქმე, რატომ?

ჰამი-კარგი. დრო მართლა აღარ მაქვს.

ჰამი-ერთხლაც (პაუზა)... ალო,ტეტი!

ტეტი-გისმენ, ჰამი!

ჰამი-შეგიძლია მესაუბრო.

ტეტი-ყოველთვის შემიძლია.

ჰამი- არა , უფრო სწორად, სურვილი ამისრულო...

ტეტი-გისმენ!

ჰამი-შეგიძლია?

ტეტი-შევეცდები!

ჰამი-ხმა არ ამოვიღოთ...

(რამდენიმე წუთი სიჩუმეა)

ტეტი-აუტანელია...

ჰამი-სიჩუმე?

ტეტი-სიჩუმის მოსმენა.

ჰამი-და ამ სიჩუმის უკან მიმალული სუნთქვა.

ტეტი-სუნთქვის შეკავებას ვცდილობ, რომ არ დავარღვიოთ სიჩუმის ხმა.

ჰამი-კარგი, ტეტი, გამიხარდა, რომ ყურმილთან აღმოვაჩინე.

ტეტი-როგორ შევივსე, ჰამი. არ დამემშვიდობო, კიდევ ვისაუბროთ.

ჰამი-ნახვამდის.

სურათი მეხუთე

ჰამი-საწოლი უბალიშოდ, მივლინება ტეტის გარეშე...სანდრა(ეძახის)! სანდრა ! კარზე
ზარია, შეგიძლია გააღო?

სანდრას ხმა-არა.

ჰამი-კარგი.. ჩამოხვედი?

ტეტი-ჩამოვედი

ჰამი-რამდენი დღით?

ტეტი-არ ჩამეხუტები, ჰამი?

ჰამი-არ ვიცი.

ტეტი-შენ მე ამდენი ხანი მელოდებოდი.

ჰამი-ალარ მახსოვხარ, ტეტი.

ტეტი-ერთი წელი.

ჰამი-რომელიც ერთ საუკუნედ იქცა.

ტეტი-შეიძლება შემოვიდე?

ჰამი-(ნაღვლიანად) და აქ არა ხარ ...

ტეტი-ზუსტად ისეა ყველაფერი, როგორც წერილებში.

ჰამი-უბრალოდ, რამდენიმე ნივთი შევცვალე.

ტეტი-საწოლი...

ჰამი -შენი საწოლი...

ტეტი-ბალიშები სად წაიღე?

ჰამი-გაქრნენ.... ისინ ჩვენ ვიყავით და ისინი ვეღარ იტანდნენ ერთმანეთს...

ტეტი- ჰამი, მაშინებ...

ჰამი-ეს შენი სიტყვები არ არის...

ტეტი-მე ვამბობ, ჰამი, ჩემს გარდა ოთახში არავინაა.

ჰამი-შენ ჩემი ბალიშის სიტყვებს ამბობ, რომელიც ჩემს წერილში ამოიკითხე.

ტეტი-მე მგონი, გადაღლილი ხარ...

ჰამი-მოლოდინით.

ტეტი-ბევრს მუშაობ?

ჰამი-მოლოდინში.

ტეტი-უნდა დაისვენო.

ჰამი-ვისვენებ.

ტეტი-მე მახედნიერებდა შენი წერილები.

ჰამი-ერთხელაც არ მიპასუხე.

ტეტი-ვერ შევძელი.

ჰამი-არ შეძელი.

ტეტი-მგონია, რომ უცხო ადამინთან მოვხვდი.

ჰამი- შენს გამო პარტნიორი დავტოვე (პაუზა). ვიცი, ეს არასოდეს გითხოვია, არც გქონდა მოთხოვნის უფლება, მაგრამ სხვანაირად არ შემეძლო.

ტეტი-მომეცი უფლება, ჩაგეხუტო.

ჰამი-მე ამის უფლებას ყოველდღე გაძლევდი, ტეტი...

ტეტი- ახლა შენს წინაშე ვარ, მართლა ვარ, ვოცნებობდი ჩვენს შეხვედრაზე; წამზე, როდესაც გნახავდი, ჩაგიკრავდი, გაკოცებდი.

ჰამი-ადრე მეც სხვანაირად წარმომედგინა ჩვენი შეხვედრა.

ტეტი-ჰამი, ვიცი – გაბრაზებული ხარ.

ჰამი-არა, არ ვარ გაბრაზებული, გადამიარა.

(უხერხული დუმილია)

ტეტი-მომიყევი შენი ამბები. გინდა, ყავას მე მოგიხარშავ.

ჰამი-შენ უკვე გამიმზადე ყავა ღამით, დილით კი სადღაც გავქრით ორივე (პაუზა). იცი, გავქრით შენც და მეც...

ტეტი-მანერვიულებ, ჩემო მშვენიერო...

ჰამი-მშვენიერო? სარკე მომაწოდე, ტეტი, მაგიდაზე დევს.

ტეტი-გამომართვი.

ჰამი-აი, მშვენიერი...

ტეტი-ექიმთან უნდა წავიდეთ.

ჰამი-შენ წახვალ, მე აქ ვრჩები.

ტეტი-ჰამი, ჰამი, ისე ძლიერ მინდოდა ჩაგხუტებოდი...

ჰამი-რა მჭირს, ტეტი? (ტირის)

ტეტი-როგორ მომენატრე...

ჰამი-მივლინება?

ტეტი-დიახ, სახლში იციან – მივლინება მაქვს.

ჰამი-მატყუარა(ზედნიერი ხმით)...

ტეტი-შენმა წერილებმა მიხსნეს.

ჰამი-რამდენი ხნით შეგიძლია დატოვო ისინი?

ტეტი -არ ვიცი.

ჰამი-ჩემოდნის ზომით თუ ვიმსჯელებთ, რამდენიმე დღით.

ტეტი-მე გოგოები მყავს.

ჰამი-მიყვარს შენი გოგოები.

ტეტი-მე შენ მიყვარხარ, ჰამ! ჩემო სიყვარულო...

ჰამი-ჩუ, ტეტი, ჩვენ ჩვენი სიყვარული დიდი ხნის წინ გავასხვისეთ, არ შეგვიძლია ერთმანეთი გვიყვარდეს (პაუზა). ტეტი, წერილები დამიბრუნე, ისინი მე მეკუთვნის.

ტეტი-არ შემიძლია , დაისვენე, ჰამი...

ჰამი-არ მინდა, სულ მძინავს.

ტეტი-შენ მუშაობ და საერთოდ არ გძინავს.

ჰამი-ვერ ვიტან, როდესაც ჩემზე ზრუნავენ.

ტეტი-ნუ მექცევი ასე, საყვარელო...

ჰამი-დამავიწყდა როგორი საყვარელი ხარ.

ტეტი-შეგვიძლია გავიხსენოთ.

ჰამი-რა საჭიროა.

ტეტი-რატომ, ჰამი, მე ჩამოვედი...

ჰამი-მესმის, რომ ჩამოხვედი.

ტეტი-როგორც კი შევძელი.

ჰამი-უფრო მესმის.

ტეტი-შენ დამცინი, მშვენიერო...

ჰამი-არა, არ შემიძლია დაგცინო.

ტეტი-თუ რამე შეიცვალა, თუ რამე გადაწყვიტე...

ჰამი- გადავწყვიტე?

ტეტი-მიტხარი და წავალ.

ჰამი-არა, არა, ტეტი, არსად არ წახვალ!

ტეტი-მაშინ მომეცი უფლება და დავრჩები. აი, ისე იქნება ყველაფერი, როგორც ერთი წლის წინ. ჟოლოფების ქვემოთ კოკისპირული წვიმა გახსოვს?

ჰამი-და ღამე ჩვილი, ჩვილი იმაზე, თუ ამხელა კაცი როგორ იქცეოდი...

ტეტი-შენთან ერთად ბავშვი ვარ, ჰამი.

ჰამი-სულ პატარა გოგო აღარც მე ვარ.

ტეტი-იცი, დღეში ასჯერ შემეძლო შენი წერილების წაკითხვა.

ჰამი-(იცინის) ცოტაა ...

ტეტი-და მერე ათიათასჯერ მეფიქრა შენზე (პაუზა). როგორ შემაშინე, ჰამი.

ჰამი-გაივლის (პაუზა), შიში გაივლის.

ტეტი-შენ ყველაფერს მაძლევინებ.

ჰამი-და მაინც დანამატი ვარ.

ტეტი-რა?

ჰამი-არაფერი, ტეტი. ერთი სურვილი ამისრულე.

ტეტი-ბევრს აგისრულე, ჩემო მშვენიერო.

ჰამი-ორი ფერადი ბალიში მიყიდე და მაჩუქე, დამიბრუნე ჩვენი თავი...

ტეტი-ჩემი პატარა გოგო, ახლავე წავალ და მოგიტან, ნიშნად ბედნიერებისა და სულ შენთან ვიქნები, ყოველთვის შენთან.

(ისმის კარის ხმა)

ჰამი-მისი ჩემოდანი. აი, ჩემი წერილები. მისი სუნი აქვს. სანდრა, სანდრა, აი, ქვითრები, მე მივდივარ, როგორც შევთანხმდით. დიდი მადლობა ამ ერთ წლისთვის, ყველაფერი კარგად მომაგონდება. ჩემოდნები უკვე წაიღეს მუშებმა. შენ ძალინ ლამაზი და საყვარელი გოგო ხარ. ვინ იცის, იქნებ ოდესმე კიდევ შევხვდეთ ერთმანეთს.

სანდრას ხმა-ბედნიერად, ჰამი!

(ისმის კარის ხმა, სიჩუმეა, რამდენიმე წუთში ისევ ისმის კარის ხმა)

ტეტი-ჰამი, ჰამი (იმახის) ჰამი!!!

სანდრას ხმა-ბატნო!

ტეტი-გამარჯობათ, ჰამი სად არის?

სანდრას ხმა-ვერ გავიგე?

ტეტი-ჰამი?!

სანდრას ხმა- ჰამი აქ არავინ ცხოვრობს.

ტეტი-როგორ, ჰამი, ჩემი ჰამი...

სანდრას ხმა-ალბათ მისამართი შეგეშალათ.

ტეტი-აი, შავი თმით, საშუალო სიმაღლის...

სანდრას ხმა-(აწყვეტინებს), ვერაფრით დაგეხმარებით.

ტეტი-ჰამი, ჰამიი (ჰაუზა)! ჰამი (თავისთვის), ღმერთო, მისი გვარიც არ ვიცი...

(ისმის ფეხის ხმა)

სანდრას ხმა-თქვენი ბალიშები, ბატონო!

1013წ. აპრილი - ლ.შენგელია